

四庫全書

集部

欽定四庫全書

集部

南湖集卷十九

詳校官庶吉士

臣范逢恩

主事

臣呂雲棟覆勘

謄錄監生

臣劉增

欽定四庫全書

南湖集卷九

宋 張鎡 撰

七言絕句

方壺

在茶簾洞中

春在壺中晚更長
衆仙相命醉霓觴
戲將龍腦真珠網
搭上周迴碧玉廊

白頭翁鳥

檜叢幽轉愜新晴
巧好春林百鳥聲
羽輩誤教推皓首

細聽多是少年情

暫往嘉興離桂隱過渡

側望山來起復平
橫波去碧還明
誰言身在笥輿上
自是來風空裏行

暫歸桂隱雜書四首

風院簾垂颭翠旌
茂陰疎轉表新晴
清和自是常年景
有底今番觸撥人

作雙鷗鷺住方池
樂此荷錢近釣磯
應笑主翁塵袂黑

故從清泚浣紅衣

詩料無窮滿目前只須拈出見成篇
騎兵莫道隨官俗也解爭奴曲澗船

茅屋烟升正早炊覆牆高柳漲新枝
飛綿莫便沾泥去舊愛疎籬雪下時

嘲蝶

柳外飛飛蛺蝶兒惠風心性彩雲姿
終朝守定牆頭舞不得鄰家一句詩

至華藏寺先呈璉長老

切莫撞鐘領衆迎作家相見要情真亦庵自是優婆塞

知事當人定不瞋

知事瞋見僧
惠洪林間錄

薺花

薺花繁處蝶爭飛忽憶前年三月時流水流杯人共醉

晚來疎雨又新詩

題左顧亭

物我何曾有異同莫言龜印偶相逢水中放去爐中得

心法須知一鏡空

安溪道中

染晴波色重於藍
烟塢人家屋雨三
明月在山天在水
後回休睡泊溪南

七夕口占

涼生金井未飄桐
月戶星樓記古風
乞巧頻年但成拙

懶將祈請效兒童

老杜牛女詩
祈請走兒童

七夕池上泛舟四首

居士乘閒養就癡爭如靈鵲自知時不從樓上求新巧
却向船中賦拙詩

秋入馮夷碧殿涼仙遊十萬不分行錦蛺蝶香滿烟蒙繖
翠鳳光浮露滌裳

柳繫荃橈句未成撥船微動碧香迎琉璃自愛無瑕翳
不放池西一葉生

夜雨連明旋出奇漲平荷蓋失參差更教紅蓼肩齊水
要學湘妃曉浴時

龍瑞宮

陽明古剎閼靈宮
禱雨傳聞見活龍
可是高人不留我
却從歸路數杉松

秋清

更闌何事識秋清
歷歷江湖興致新
犬吠數聲風外舫
隔城同是未眠人

橋廊上作

夜半沾衣露氣濃
茂林迴岸月攀鬆
無人不道長安住

却似亂山烟翠中

千載清風笠澤仙
提携曾置筆床邊
吾行不汲長橋水

要煮青山陸羽泉

煎白雲茶二首

白雲寺在宣城賞溪之西唐宣宗有詩云長安若問江南事說

道風光
在水西

水西幽寺風光足
山上行雲雪色明
不放精英入閒草

夜鐫嘉話得松聲

嫩芽初見綠蒙茸
已破人間睡思濃
玉食會當陪上苑

貴名高冠密雲籠

得巨筍三尺圍送王叔興

猫頭名字出長沙別號犀株豈過誇好對竹尊招二子
藕如船大棗如瓜

得巨魚送叔祖

桃花流水正闌渠雨後俄收紫鱸魚豈是齋厨真欠此
小詩聊當腹中書

舟行觀新月

一痕如掐夕天涯望轉青林出沒時不是山高愛藏月
月光猶嫩怯人窺

蘇隄觀木芙蓉因見淨慈明上人翌日惠詩酬

贈二絕

來訪秋花本為詩酒杯徵逐負幽期山中句出明書記
還了清邀一段奇

口邊白醖公家事坐上清狂我輩真會乞一閒歸故隱
定因能賦結高人

池上木芙蓉欲開述興二首

芙蓉環望壓波明
燕尾舟從綠處撐
待得花成紅杏墮
老夫天地錦縱橫

岸中三酌便酣眠
墮地驚牋寫未全
明日滿城人定說
若無詩累是神仙

題羔羊齋外木芙蓉

慵粧酣酒夕陽濃
洗盡霜根看綺叢
綠地圍花紅錦障
不知庭院有西風

窓前木芙蓉

辛苦孤花破小寒
花心應似客心酸
更憑青女留連得
未作愁紅怨綠看

山堂

芒鞋疎到筍籬東
慣得蒼苔把徑封
已愧君詩足真味
尚將雞肋較駝峯

王侔德遠有詩謝送菊因酬二絕

晚香烟冷萬金籬
林下何曾必課詩
如許簿書花一到

便成瓊報碧雲詞

愛竹君家有子猷
黃花君復向人求
不妨官事兼幽事
應笑儂歸兩過秋

九日

重陽冷菊青黃蕊
半醉幽人黑白頭
今歲有番堪恨處
病無詩句過中秋

麗秋花

疎翠巧裝丹鳳尾
素綃輕紐玉蟲鬚
春花莫把秋叢薄

若比嬌妍總合輸

金鳳花

彩鳳連翩小作羣
蕭條門巷獨留春
莫因繁冶生輕鄙
歲歲花開見主人

漫興

樂天閒適文章累
陶令歸來兒子憂
兩事吾今渾放下
看山臨水更何愁

茆舍絲瓜弱蔓堆
漫陂鴨鴨去仍回
開簾正恨詩情少

風捲野香迎面來

覓句

覓句先須莫苦心從來瓦注勝如金
見成若不拈來使箭已離弦作麼尋

憶南湖

暖雲臺觀統歌絃花底吹香翠鬢船
開處如今渾懶去可能心緒數年前

漁父詞

西塞山前得杖藜
波晴不見鷺羣飛
何曾千載同心處
只在斜風細雨時

勝槩居常畫裏求
鰕魚清夢落滄洲
今朝親見桃花樹
重振家聲是此秋

新種

新種枇杷花便稠
被香勾引過溪頭
黃蜂紫蝶都來了
先賞輸渠第一籌

山行

鳥飛不過人行處山好直連天盡頭下馬忽逢難畫景
溜聲戛玉亦銷憂

謝人送白山茶花二首

韻勝初聞不記年偶逢俄在軟紅邊山礬不過南昌老

爭得嘉名亞水仙

山茶花初因山谷得名而韻勝字亦見山谷白山茶賦近時都城來有重

此花者

屋角春聲喜報晴青裳玉面曉粧明為君自斷天休問

依倚清香樂此生

欲移植
書軒旁

即目

偶然看樹過平橋老盡牆邊杞朮苗不分蛛絲與蝸殼
也隨殘照集芳條

紅佛見笑花

芳菲成夢雨廉纖慰眼嬌紅敢浪嫌不但瞿曇當發笑
老夫初看亦掀髯

芍藥花二首

自古風流芍藥花花嬌袍紫葉翻鴉詩成舉向東風道

不願旁人定等差

吟牋欠向此花題
未信翻堦句絕奇
三嗅蒼髯惹黃粉
又成空對剪來枝

白楊梅

興高團雪綴珍叢
彈火燒林一洗空
驛騎不供妃子笑
冰姿猶勝荔枝紅

書北廳後簷壁

重陽過後雨垂垂
病怯新寒獨立時
菊有萬株歸未得

一窻來此看花枝

分韻賦散水花得鹽字

春皇遊騎玉垂鞭
珠捲揚州十里簾
一笑詩成休浪舉
花如西子句無鹽

盈枝點綴雪花鮮
環映清流分外妍
應是東君歸騎速
不如墜下玉絲鞭

苔徑斜通砌竹鞭
素光交映入湘簾
若教謝女庭前種
不道空中雪似鹽

盆橘

懶向江頭置木奴
瓦盆聊玩綠垂珠
何煩二老輸羸決
始悟商山樂不殊

霜橘

半霜黃綠尚爛斑
笑指清芬數日間
會得此中堪樂意
洞庭端合傲商山

九月梅花

寂歷疎條葉未空
忽驚冰靨照霜風
秋來心事誰能領

不向籬邊數菊叢

南湖賦冬青花四首

雜樹花香少似君
雨餘風曉或斜曛
行人不著清新句
亦合移時駐屐聞

上林名字萬年枝
高映宮牆側映池
不是移根閒地種
歲寒情性有誰知

酷烈深憐格外香
樹邊苔氣與蒼涼
莫教糝徑渾如雪
快向青陰置竹床

桂子休誇碧滿園
小蒲萄實待霜繁
他年隱處尋西宅
先認冬青擁寺門

書蒼寒堂壁二首

隔竹紅梅酷似桃
政宜修澗綠周遭
武陵風景何時別
不絕人來意更高

一燈清坐欲三更
月到疎櫺隴鬆明
除了當欄松上鵲
無人聽得讀書聲

霜節堂

風冽前村有墮巢何心寒苦自為高堪憐讓殺閒桃李
只得虛堂兩字褒

園中雪夜二首

簫鼓喧闐樂夜堂寶燈初試雜花光欲知富貴天然處
盡把園林腦子裝

急傍欄干喚酒杯却嫌紅燭炫高臺新圖水墨兼凝粉
展向冰溪鏡面開

記雪三首

清曉疎籬尚露根
飯餘俄復擁柴門
南湖水色君知否
萬斛鵝黃貯玉盆

直教日色避寒光
世界移來玉海藏
何事連年無此景
老天遊戲不循常

無月無燈夜自明
模糊何啻瓦溝平
不拖藜杖高橋去
那得金龍背上行

水梔

拳石泓泉媚淺沙
孤根蟠窟養清華
細看六出瑤英小

蒼藟分明是雪花

汲水埋盆便當池水梔花旺雪盈枝江湖萬里何曾遠
祇在先生託興時

夙興

霜池微帶月痕斜風竹聲如撒細沙坐到曉窓尤可愛
只愁烘損臘梅花

臘梅二首

金谷園中夜罷炊照花滴臘上林枝清芬更比寒梅耐

不是蜂房借蜜脾

家世凌風却月旁
別來衣變鬱金光
神仙定遇容成子
教服三黃遍體香

龍井山主送臘梅

風落松釵滿磴橋
野蜂移蜜上枯條
道人參得山中語
不是塗黃一樣嬌

次韻茂洪覓臘梅

世路巖峯費折枝
退耕非我更其誰
真花似假無心詠

只誦涪翁舊日詩

種臘梅喜成

道旁方訝撲人香
金蓓花開滿擔裝
尚有松釵掛枝杪
買歸偏稱插山堂

僧廬草劒石崖根
慣見西湖不喜論
安得便如居士意
移為官舍讀書軒

走筆和曾無逸掌故約觀玉照堂梅詩六首

纔晴便是看花時
記事君曾有四詩
及至花開風日好

不聞拄杖扣疎籬

纔晴便是看花時
天上陰晴豈預知
前日路乾居士病
偶妨招客酒樽隨

纔晴便是看花時
不覺飄香不滿枝
小道山翁如具眼

綠陰初試更相宜

架閣庫人
號小道山

纔晴便是看花時
自看何如與客期
亦有數篇花下句
苦無風味怕人知

纔晴便是看花時
休問花名是阿誰
藉使無梅桃杏在

但能來賞莫嫌遲

纔晴便是看花時
夜雨何堪帶雪吹
春色更拚過數日
三分餘一尚堪追

玉照堂次韻茂洪古梅

天教萼綠伴羊權
羞對塵顏粉黛妍
不必修真事靈訣
與花端合共長年

玉照堂梅花飄落如雪

陣陣翻空回旋飛
綴巾沾袖却橫吹
東風秘授看花訣

不在開時在落時

梅

羣玉山頭昨夢歸
占祥獲應必無疑
今朝暫歇抄書課
急為寒梅辦早詩

驅鶴松門去却回
似知草際有香來
青條紅眼纔窺煖
拄杖先搔費綠苔

冒寒崗路透溪橋
驢僕翩翩葉亂飄
還是去年初見處
青旗茅店恰相招

尋梅三首

紺碧烘晴水照天，斷槎荒葑牧羝田。
數旬不踏蘇堤路，專為梅花跨曉鶉。

柴界牆頭蜂未窺，草烟沙逕亦空枝。
要知愁結吹香晚，

鐵石心腸欠我詩。

韓園邂逅一來尋，還憶朱欄小院深。

園基舊屬寶雲寺東坡賞瑞香詞云

小院朱欄幾曲正此地也

相對兩亭無四壁，定參陶令不絃琴。

春雪阻觀梅花兩詩嘲之

弄珠縈珮白衣仙
遊戲塵寰占歲前
却被天公撒龍腦
擁教無地著雲駟

雨聲俄混雪聲乾
泥濘林堂一到難
藉使玉肌無凍粟
可能獨自過春寒

玉照堂觀梅二十首

一笑林間說向春
宿緣三世豈無因
半生憂患摧殘損
却與梅花作主人

映竹依松望最宜
如無似有乍開時
思量切比幽人語

不著工夫格自奇

生怕高花易過春隔年先早著精神冰綃旋買連三幅

剩與溪山併寫真

去冬嘗
畫梅屏

縱橫逆襯碧雲端林下鋪氍坐卧看不但歸家因桂好
為梅亦合早休官

羣芳非是乏新奇或在繁時或嫩時唯有南枝香共色
從初到底絕瑕疵

六日新春一再來直須登樹賞花開攀翻徑上枝梢外

不負東風是此杯

從來嫌用和羹字
纔到詩中俗殺人
一片彩雲溪上暖
興隨芳草夕陽新

醉上輕舟泛淥漪
細穿橋柱獨行遲
風前撫掌催花發
驚起羣飛五色兒

山際樓臺水際村
見梅常是動吟魂
全身此日清芬裏
籬落疎斜不喜論

別開庭院近蓮塘
油榭欄干小扇窓
更取梅花瓶內插

放教清夢月橫江

蕭然日月岸綸中春滿幽園肯倦行一事尚須煩造物
看松微雨看梅晴

正煖休嫌夜雨來恐花乘煖一齊開不然何事東風意
容易吹香與碧苔

鴉鵲呼人曉夢回霽光催賞百株梅輕車不管沾泥滑
童子從來自慣推

蒼帝妃嬪總素裝勝遊常是遍江鄉玉樓謫墮遲歸去

冷淡工夫笑我忙

九節筇枝休化龍佳時朝暮且相從
枯條豈但敲令盡
鳥雀衝花定不忙

今夕懸知月未圓照梅已自不勝妍
冰姿玉色誰堪比
除是姮娥敢並肩

喜客能揮白玉琴此花端解古時音
只防老鶴來偷聽
引起翻雲萬里心

杯行纔到莫留殘要向梅邊露肺肝
今日正晴還有雪

謂予不信試遙看

風調花常逐歲新苦慚詩思只陳陳吟成不敢分明舉
生怕渠知鄙薄人

高窠依約百年餘蠹枿重重艾衲鋪親見主人來買地
遮番添得白髭鬚

詠千葉緗梅

巧留芳艷待春回不受霜飈苦折摧應對羣葩羞冷淡
數花併作一花開

忍凍拖筇月下看烟籠繁影共汗漫絢裘不是多重數
爭奈清宵爾許寒

一枝深雪綻前村冷落猶能役夢魂況有堆林春萬疊
傳飡甘此度朝昏

光搖層蘂望晴花誰把鵝黃染練紗已是被香侵到骨
不須呼酒但烹茶

玉砌珠攢萼翠中開時應是費東風臨摹不著詩人手
剪綵徒勞蠹女工

玉照東西兩軒有紅梅及千葉綳梅未經題詠

倒用前韻各賦五首

昔遊嘗到海中光我與諸公各醉狂
同向塵中三十載
朱顏應笑鬢絲長

雖嫌綠葉與青枝入格依前自欠詩
幾向斜陽溪畔見
猶將桃杏誤猜疑

一粒丹砂換骨來移根聞自浙東栽
市門古巷留遺跡
問訊仙翁定姓梅

海棠曾把比朝眠
妃子粧慵玉鏡前
若似此花顏色好
定教天寶畫師傳

方諸臺聳日邊雲
望拜青童上相君
侍女百千皆絳服
恰如簷外樹紛紛

戲題重臺梅

只將單萼綴層花
弱骨豐肌自一家
戴幾朶來誰可稱
寶釵雙燕綠雲斜

任道源轉示玉豔亭探梅詩卷未暇屬和閏月

十一日偶自北山塔院過亭下枝間已花因次

元韻三首

因花不作等閒來
屐印苔紋酒便回
明日窓前追昨夢
似逢姑射不逢梅

細看孤標迎臘瘦
爭如繁豔遇春酣
古來節士功名薄
剩欲裁詩問水南

占斷林家一種春
隔湖茅舍羨漁人
折枝弄蕊年年手
生怕長安揖馬塵

殘梅

雨絲吹冷透窓紗
忽忽東風管鬢華
豈為梅殘便無恨
草生時節勝看花

水閣即事二首

水閣開窓景不偏
斷橋堤柳盡橫前
平生到處居人後
已有貂璫泊畫船

今歲春來我亦來
折花猶未見花開
新春況有四十日
莫怪幽人空手回

余以雪牡丹歌呈誠齋回東云只得籍沒是兵
家不傳之妙謂不和答也又嘗以來日立夏
問誠齋所謂風月庫中當作何措置蒙絕句
示報因次韻致謝併破前說云

春風欲去難留住措置無如信野人但解有詩隨手和
自然日日是青春

夏夜二首

燈暈紗籠靜者居夜涼携扇繞堦除松間有句松間說

不向空中咄咄書

天上星辰金玉基
輸贏何日是分時
多應却笑張居士
綺語妄言無了期

戲詠醵蛤

鹽作棲巢涕作脂
樽前風味不勝低
縱教一衲被雲水
無奈胷中著淤泥

尖簷帽

落魄青樓倒接羅
醉花爭插亂紅歌
如今兩塾綸巾角

汝帽尖新却自宜

欽定四庫全書

南湖集卷十

宋 張鎡 撰

詩餘

長相思

晴時看雨時看紅綠雲中駕彩鸞陽臺夢未闌 詠
伊難畫伊難服透東皇九轉丹光生玉鍊顏

夢遊仙

小姬病起惓然有入道之志因書贈之

驂鸞侶嬌小怯雲期柳戲花遊能幾日頓拋塵幻學希

夷清夢到瑤池

霞袂穩那顧縷金衣自與長生分姓譜
恰逢張老鑄丹時此意有誰知

晴晝永閑步小園中羽帔雲輕蒼佩響
寶冠星瑩紺紗籠波秀淺蛾峯

琳洞窈人靜理絲桐泛指餘音搖桂影
過墻高韻入松風月上翠樓東

又
記夢

飛夢出閑到玉京遊塵隔天高那得暑月明雲薄淡於秋宮殿鎖金虬

冰珮冷風颺紫綃裘五色光中瞻帝所方知碧落勝炎洲香霧濕簾鉤

歸興動騎鶴下青冥幾點山河浮色界一簪風露拂寒星銀漢悄無聲

鸞嘯舞仙樂送霓旌摘得琪花飛散了却將何物贈仙卿衣上彩雲輕

昭君怨 遊池

拂曉擎舟東去細看荷花乘露紅綠總吹香一般涼
會享人天清福休把兩眉輕蹙誰道做神仙戴貂蟬

又 月夜放船

船過柳灣亭曲萬葉圓荷浮綠月照水珠明一池星
光透玻璃香蒂夢入藕絲中戲却上小金臺怕歸來

又 園池夜汎

月在碧虛中佳人向亂荷中去花氣雜風涼滿船香

雲被歌聲搖動酒被詩情掇送醉裏卧花心擁紅衾

霜天曉角

汎池

荷花間發撐破玻璃滑拂拂香風微度吹雪亂數根髮
弄泉羅蓋匝萬顆真珠撒唱我蓮歌歸去凌波步水
仙襪

如夢令

雪

人在驂鸞深院誤認落梅疎片零亂舞東風雲淡水平
天遠簾卷簾卷飛上繡裯不見

南鄉子 春雪

翠袖怯春寒對雪偏宜傍彩欄
弱骨豐肌無限韻憑肩
共看南牕玉數竿
羔酒莫留殘更覺嬌隨飲量寬
小立妖嬈何所似風前柳絮飛時見牡丹

烏夜啼 夜坐

月兒猶未全明乞憐生幾片彩雲來去更風輕
應見我行又坐苦凝情卷起簾兒不睡到三更

菩薩蠻 芭蕉

風流不把花為主多情管定烟和雨
瀟灑綠衣長滿身
無限涼
文牋舒卷處似索題詩句
莫凭小闌干月明
生夜寒

又
鴛鴦梅

前生曾是風流侶返魂却向南枝住
疎影卧晴溪恰如
沙暖時
綠窓嬌插鬢依約猶交頸
微笑語還羞願郎
同白頭

又
遣興

藤床巧織波文小翻書欲睡鶯鶯覺繞舍燦明霞短長
旌節花 此身無繫著南北東西樂碧宇朗吟歸天風

香染衣

碧宇余家竹堂名也

折丹桂

中秋南湖賞月

玉為樓觀銀為地秋到中分際澹金光襯水晶毬上碧
虛千萬里 香風浩蕩吹蟾桂影落澄波底揭天簫鼓
要詩成任鶯鶯魚龍睡

清平樂

題黃寧洞天吹笛臺

蒼崖疊嶂有路梯雲上忽見地平方數丈坐石風林相
向鳳膺時作龍聲夜深驚動寒星幾點光芒欲下傍
人頭上來聽

又
炮栗

蛸房秋熟紫實色黃玉吹葉風高銷舊綠疎影半遮茅
屋山居未覺全貧園收今歲盈囷自撥埽爐松火細
煨分餉幽人

謁金門
秋興

秋淡淡彌望暮天雲黯窓小新糊便老眼不應疎酒盞
菊淨橙香霜晚何處數聲來雁飛下湖邊紅蓼岸有
詩方許看

又賞梅即席和洪內翰韻

何許住不屬西湖烟雨雪後偏憐香猛處全勝開半樹
試倩暖雲收貯桃杏儘教羞妬只把新詞林下去一
春休著語

柳梢青

適和軒

一望清溪兩堤翠蔭半紙新詩涼滿衣裳香生筆硯風
動牕扉 月明撐箇船兒載龍玉雙娥對吹竹外山亭
花邊水檻不醉休歸

又

秋日感興

烟淡波平蓬鬆岸蓼紅淺紅深滿院西風連宵良月幾
處清砧 區區宦海浮沉幸隱去將醅素心兩鬢吳霜
一屏秦夢誰是知音

又

雨後天涯微雲送晚過盡歸鴉何處開樽海棠亭小飛
燕風斜 有人粲玉嬌花更翳鳳曾遊帝家長遠身心
溫柔情態不枉多他

好事近

擁繡堂看天花

手種滿欄花瑞露一枝先折拄箇杖兒來看兩三人閒
客今朝歡笑且銜盃休更問明日此意悠然誰會有

湖邊風月

瑞露紫牡丹新名也

訴衷情

得二白雁偶亡其一感而歌之

筠籠白雁得時雙
一自戲回塘
冰魂問歸何處
明月影中藏
蘋蓼岸鎮相將
忍思量
曉昏應是夢
繞江湖
怕見鴛鴦

浣溪沙

無計長留月裏花
收英巧付火前茶
綠塵飛處粉芳華
午夜露濃天竺徑
一秋香滿玉川家
掃除殘夢入雲涯

虞美人
詠水蒨花

粧濃未試芙蓉臉却扇涼猶淺粉輕紅裊一生嬌風外
細香時伴濕雲飄雙飛屬玉來還去誰識幽閒趣莫
教疎雨暗黃昏已是不禁秋色怕銷魂

玉團兒

香月堂古桂數十株着花因賦

曉來一陣金風劣把閨海檀霞細屑依就花兒深藏葉
底不教人折初開數朶誰知得却又是金風漏泄吹
起清芬露成香露月成香月

眼兒媚

初秋

淒風吹露濕銀床涼月到西廂蛩聲未苦桐陰先瘦愁
與更長起來沒箇人做采枕上越思量眼兒業重假
饒畧睡又且何妨

又女貞木

山礬風味木樨魂高樹綠堆雲水光殿側月華樓畔晴
雪紛紛何如且向南湖住深映竹邊門月兒照著風
兒吹動香了黃昏

又水晶葡萄

玄霜涼夜鑄瑤丹飄落翠藤間西風萬顆明珠巧綴零
露初溥詩人那識風流品馬乳漫堆盤玉纖旋摘銀
嬰分釀莫負清歡

南歌子

山藥

種玉能延命居山易學仙青青一畝自鋤烟霧孕雲蒸
肌骨更凝堅熟染蜂房蜜清漆石鼎泉雪香酥膩老
來便煨芋爐深却笑祖師禪

瑞鷓鴣

詠二色葡萄

陰陰一架紺雲涼。裊裊千絲翠。蔓長紫玉乳圓秋結穗。
水晶珠瑩露凝漿。相並熟。試新嘗。累累輕剪粉痕香。
小槽壓就西涼酒。風月無邊是醉鄉。

江城子

黃子由少監同內子慧齋奉岳母定齋
相過席間因走筆次韻

試霜池面淺粼粼。鵲飛晴。遠峯明。蓬島羣仙來過瑞雲。
清龍榜當年人第一。黃叔度是前生。玉堂行見演絲綸。
綵毫輕思難停。醉裏長鯨翻浪吸。東溟謝女風流相稱。
稱好金母更鬢常青。

又 凱還

春風旂鼓石頭城
急麾兵斬長鯨
緩帶輕裘乘勝討蠻荆
螳聚蜂屯三十萬
軍面縛赴行營
舳艫千里大江橫
凱歌聲犬羊驚
尊俎風流談笑酒
徐傾北望旄頭今已滅
河漢澹兩臺星

卜算子

無逸寄示近作梅詞次韻回贈

常記十年前共醉
梅邊路別後頻收尺素書
依舊情相與
早願却來看玉照
花深處風煖還聽柳際鶯
休唱

閑居賦

楊柳枝

綠蠟芽疎雪一色
紋雲梢清香却暑
置堂坳晚風飄
冰電無聲棲碧葉
笑仍嬌相隨茉莉
展輕綃伴涼宵

感皇恩

駕霄亭觀月

詩眼看青天幾多虛曠
雨過涼生氣蕭爽
白雲無定吹散作
鱗鱗瓊浪尚餘星數點
浮空上
明月飛來寒光
磨盪彷彿輪間桂枝
長倚風歸去縱長嘯
一聲悠颺響

搖山岳影秋悲壯

夜遊宮

美人

鵲相龐兒誰有兀底便筆描不就小邈如何敢出手細
端相甚精神甚洗漱到老長厮守不喫飯也須唧啣
你待色彈怎開口煖底雪活底花嫩底柳

醉高樓

初月

浮雲散天似碧琉璃月正是上弦時姮娥蟾兔俱何在
廣寒宮殿不應虧這神功千萬世有誰知甚只解催

鬚鬢老更不算將人情緒惱攬掇酒撼搖詩山頭望伴
疎星落庭前看照好花移夜無眠應笑我怎如癡

蝶戀花

楊柳鞦韆旗鬪舞漠漠輕烟罩定黃鸝語紅滴海棠嬌
半吐燕脂水是朝來雨行過池邊携手路都把多情
變作無情緒唯有東風知住處憑君送取溫存去

又南湖

門外滄洲山色近鷗鷺雙雙惱亂行雲影翠擁高筠陰

滿徑簾垂盡日林堂靜
明月飛來烟欲暝水面天心
兩箇黃金鏡慢颭輕搖風不定漁歌欸乃誰同聽

又挾翠橋

灑面松風似涼水下看冰泉噴薄溪橋底疊疊層峯相
對起家居却在深山裏
枝上凌霄紅繞翠飄下紅英
翠影爭搖曳今夜巖扉休早閉月明定有飛仙至

鵲橋仙 立秋後一日

暑雲猶在澄空欲變入夜徘徊庭際新秋知是昨宵來

愛殘月纖纖西墜 芭蕉老大流螢衰倦靜裏細觀天
意輕風未有半分涼奈人道今宵好睡

又 采菱

連汀接渚紫蒲帶藻萬鏡香浮光滿濕烟吹霽木蘭輕
照波底紅嬌翠婉 玉纖采處銀籠携去一曲山長水
遠彩鴛雙慣貼人飛恨南浦離多夢短

鷓鴣天

自興遠橋過清夏堂

閑立飛虹遠興長一方雲錦薦疎涼翻風翠蓋無塵土

出水紅粧有豔香 攜靚侶沉輕航
棹歌驚起野鴛鴦 同過清夏看新月
茉莉花圍小象牀

又 詠阮

不似琵琶不似琴 四絃陶寫晉人心
指尖歷歷泉鳴澗 腹上鏘鏘玉振金
天外曲月邊音為君轉軸擬秋砧
又成雅集依相坐清致高標記竹林

臨江仙

余年三十二歲在甲辰常畫七圈于紙
揭之坐右每圈橫界作十眼歲塗其一

今已過五十有二悵
然增感戲題此詞

七箇圈兒為歲數年年用墨糊塗一圈又剩半圈餘看
看雲蔽月三際等空虛縱使古稀真箇得後來爭免
嗚呼肯閑何必更懸車非關輕利祿自是没工夫

御街行

燈夕戲成

良宵無意貪遊翫奈鄰友閑呼喚六街非是少人行不
似舊時風範笙歌零落綺羅消滅枉了心情看思量
往事堪腸斷怕頻到簾兒畔朦朧月下却歸來指望阿
誰收管低頭注定兩眼兒淚百計難消遣

滿庭芳

月洗高梧露溽幽草寶釵樓外秋深土花沿翠螢火墜
墻陰靜聽寒聲斷續微韻轉淒咽悲沉爭求侶殷勤勸
織促破曉機心兒時曾記得呼燈灌穴歛步隨音任
滿身花影猶自追尋攜向華堂戲鬪亭臺小籠巧粧金
今休說從渠牀下涼夜伴孤吟

風入松

小樊標韻稱香山壓盡花間便須著箇樓兒住彩鸞看

飛舞妖閑珠珮時因醉解雲扉常為春闌耳邊囑付
話兒姦休放蠻檀綠窓惟怕今宵夢鸚聲巧春滿欄干
待把衷腸教與却愁長遠都難

念奴嬌 千葉海棠

綠雲影裏把明霞織就千重文繡紫膩紅嬌扶不起好
是未開時候半怯春寒半便晴色養得胭脂透小亭人
靜嫩鶯啼破清晝猶記攜手芳陰一枝斜戴艷嬌波
雙秀小語輕憐花總見爭得似花長久醉淺休歸夜深

同睡明日還相守免教春去斷腸空歎詩瘦

水調歌頭

姑蘇臺

孤櫂沂霜月還過闔廬城繫船楊柳橋畔吹袖晚寒輕
百尺層臺重上萬事紅塵一夢回首幾周星風調信衰
減親舊總凋零認羣峯尋四塔半烟橫平生感慨況
逢佳處輒銷凝休說當時雕輦不見後來遊鹿斜照水
空明猛把畫欄拍飛燕兩三聲

又

項平甫大卿索賦武昌凱歌

忠肝貫日月浩氣扶雲霓詩書名帥談笑果勝棘門兒
牛弩旁穿七札虎將分行十道先解近城圍一騎夜飛
火捷奏上天墀 暢皇威宣使指領全師襄陽耆舊請
公直過洛之西簞食歡呼迎處已脫羶裘左袵還著舊
藏衣笳鼓返京闕風采震華夷

木蘭花慢 七夕

喜秋回霽宇倩涼露洗炎飈被鵲誤仙盟經年恨阻銀
漢迢迢牛閑更停弄杼趁佳期華幄傍星橋授玉鸞鵲

霧靄贈綃龍戲花嬌
歡娛回首是明朝
未別已魂銷
想翠輓珠輪歸途望斷斗轉斜杓人間易離易遇儘勝
如天上各雲霄携去一梳水月巧樓猶醉笙簫

又
癸丑年生日

年年三月二是居士始生朝
念綠鬢功名初心已負難
報勛勞天留帝城勝處匯平湖
遠岫碧岩堯竹色詩書
燕几柳陰桃杏橫橋
西鄰東舍不難招
大半是漁樵
任翁媪歡呼兒孫歌笑野具村醪
醉來更隨鶴舞看清

風送月過松梢百歲因何快樂盡從心地逍遙

又紀夢

駕飈車直上絳衣惹彩雲輕過寶樹千峯東踰綠海宮
殿崢嶸簷楹萬花粲倚映堦層十二總雕瓊劒珮簪裳
衛肅序班真輔仙卿 瑤京有誰解神昇為祕授玄經
拜九光霞裏輪金日耀丹篆符明龍鸞再催羽仗報帝
皇新御紫陽城歸路梅花弄玉數聲月冷風清

水龍吟

夜夢行修竹林中有道士頽然而長風
神秀異自稱見獨處士謂余曰人間虛

幻子能畢辭榮寵清淨寡欲當享萬
壽驚覺因賦此詞乙丑冬十二月也

這番真箇休休夢中深謝仙翁教浮生幻境向來識破
那堪又老苦我身心順他眼耳思量顛倒許多時打關
鮎魚上竹被人弄知多少 解放微官繫縛似籠檻猿
歸林草雲山有約兒孫無債為誰煩惱自古高賢急流
勇退直須聞早把憂煎換取長伸脚睡大開口笑

祝英臺近 邀李季章直院賞玉照堂梅

暖風回芳意動吹破凍雲凝春到南湖檢校舊花逕手

栽一色紅梅香籠十畝忍輕負酒腸詩興
小亭凭幾多月魄重重亂林影却憶年時同醉正同詠問公白玉堂
前何如來聽玉龍噴碧溪烟冷

滿江紅

小圃玉照堂賞梅呈洪景盧內翰

玉照梅開三百樹香雲同色光搖動一川銀浪九霄珂
月幸遇勛華時世好歡娛況是張燈夕更不邀名勝賞
東風真堪惜盤詰手春秋筆今內相斯文伯肯閒紆
軒蓋遠過泉石奇事人生能幾見清罇花畔須教側到

鳳池却欲醉鷗邊應難得

又賀項平甫起復知鄂渚

公為時生才真是禁中頗牧擎天手十年猶在未應藏
縮說項無人堪歎息瞻韓有意因恢復用真儒同建太
平功心相屬忠與孝榮和辱武昌柳南湖竹一簞瓢
非欠萬鍾非足知命何曾懷喜愠輕身豈為干名祿看
可汗生縛洗烟塵機神速

漢宮春

稼軒帥浙東作秋風亭成以長短句寄
余欲和久之偶霜晴小樓登眺因次來

韻代書
奉酬

城畔芙蓉愛吹晴映水光照園廬清霜乍凋岸柳風景
偏殊登樓念遠望越山青補林疎人正在秋風亭上高
情遠解知無江南久無豪氣看規恢意槩當代誰如
乾坤盡歸妙用何處非予騎鯨閩海更那須採菊思鱸
應會得文章事業從來不在詩書

燭影搖紅

燈夕玉照堂梅花正開

宿雨初乾舞梢烟瘦金絲裊嫩雲扶日做新晴舊碧尋

芳草幽逕蘭芽尚小怪今年春歸太早柳塘花院萬朵
紅蓮一宵開了梅雪翻空忍教輕趁東風老粉團香
陣擁詩仙戰退春寒峭現樂歌彈開曉宴親賓團樂同
笑醉歸時候月過珠樓參橫蓬島

柳塘花院現樂皆家中堂名也

賀新郎 李頤正見訪留飲即席書贈

看了梅花去要東風攀翻飛雪與君同賦海內從來天
際眼一笑平窺千古待剪盡燭花紅吐久矣南湖無此
客似喬松萬丈凌霄舉飛咳唾掃塵土承平氣象森

眉宇想天家驂鸞洞裏細烟冰霧我亦秦關歸未得誰
念干將醉撫判良夜歌橫冠屨莫嘆瀟湘居尚遠擁戎
昭萬騎鳴笳鼓雲正鎖汴京路

又

次辛稼軒韻寄呈

邂逅非專約記當年林堂對竹艷歌春酌一笑乘鸞明月
影餘事丹青麟閣待宇宙長繩穿却念我中原空有夢
渺風塵萬里迷長樂愁易老吹靈藥別來幾度霜天
鶚厭紛紛吞腥啄腐狗偷烏攫東晉風流兼慷慨公自

陽春有脚妙悟處不存毫髮何日相從雲水去看精神
峭紫芝田鶴書壯語遍巖壑

瑞鶴仙

壬子年燈夕

喜濃寒乍退風共日已作深春天氣輕車載歌吹選名
坊閑玩落梅濃李無端雨細動清愁聊成淺醉悵年時
攜手同來笑裏繡簾斜倚佳節匆匆又至撫事驚心
忍堪重記闌情倦意行不是坐不是悶歸來已早遊人
回盡燈暗重門欲閉念歡娛最是今宵怎知恁地

八聲甘州

秋夜奉懷浙東辛帥

領千巖萬壑，豈無人、唯欠稼軒來。正松梧秋到，旌旗風動，樓觀雄開。俯檻何勞一笑，瀚海蕩纖埃。餘事了，鳬鶩閑詠，命樽壘。
江左風流舊話，想登臨、浩歎白骨蒼苔。把龍韜藏去，遊戲且蓬萊。念鄉關偏憐霜鬢，愛盛名何似展真才。懷公處，夜深凝望，雲漢星回。

又

九月末南湖對菊

對黃花猶自滿庭開。那恨過重陽，凭欄干醉袖依依晚。

日飄動寒香自歎平生豪縱歌笑幾千場白髮欺人早
多似清霜誰信心情都懶但禪龕道室黃卷僧牀把
偎紅調粉拋擲向他方喚汝東山歸去正燈明松戶竹
籬旁關門睡儘教人道癡鈍何妨

江城子

夏夜

飛來冰雪冷無聲可中亭骨毛清卧看東南和露雨三
星薦地神遊天上去呼彩鳳駕雲軒望舒宮殿玉崢
嶸桂千層寶香凝搗藥仙童邀我論長生一笑歸來人

未睡花影送上牕櫺

漁家傲

拂拂春風生草際
新晴萬景供遊戲
鷗鷺飛來斜照裏
金和翠
分明畫出真山水
遮箇漁翁無愠喜
乾坤都在孤篷底
一曲高歌千古意
閒來睡從教月到花汀外

八聲甘州

中秋

歎流光迅景百年間
能醉幾中秋
正淒蛩響砌驚烏翻
樹烟淡
蘋洲誰喚金輪出海不帶一雲浮
纔上青林頂

俄轉朱樓 人老歡情已減料素娥信我不為閒愁念
幾番清夢常是故鄉留倩風前數聲橫管叫玉鸞騎向
碧空遊誰能顧黍炊榮利蟻戰仇讐

木蘭花慢

清明初過後正空翠靄晴鮮念水際樓臺城隅花柳春
意無邊清時自多暇日看連鑣飛蓋擁羣賢朱郎橫經
滿座紫微淵思如泉 高情那更屬雲天語笑雜歌絃
向啼鴉聲中落紅影裏忍負芳年浮生轉頭是夢恐他

時高會却難全快意淋浪醉墨要令海內喧傳

念奴嬌

登齊雲樓夜飲雙瑞堂

東吳名勝有高樓直在微雲齊處十二欄干邀遠望歷
歷斜陽烟樹香徑人稀廩廊山繞往事今何許一天和氣
為誰吹散疎雨知是蘭省星郎朱輪森戟與風光為
主暇日登携多雅致容我追隨臨賦小宴重開晚寒初
勁還下危梯去燭花紅墜瑞堂猶按歌舞

題南湖集十二卷後

桂隱林泉在錢塘為最勝張子卜築池臺館宇門牆道路凡經行宴息處悲命以佳名而各有詩予固未嘗歷其地乃因鄰友張以道東歸惠然寄示總八十餘絕讀之灑然而與其人岸觀散衽徜徉於烟蘿香靄間可勝欣快因為一絕題其後桂隱神仙宅平生足未登新詩中有畫一一見觚楞淳熙己酉中秋鄮峯真隱史浩書

